

(钦定)平定七省方略

北京中国书店印行



欽定平定陝甘新疆回匪方略卷二百四十六 辛未年

六月初一日

庚申

李鴻章奏言欽奉

上諭直隸練派古北口練兵一千名著催令剋日起程
前赴庫倫遵卽恭錄咨行直隸提督傅振邦派定古
北口練軍一千名交順義營都司賈吉齡統帶
查照宣化征兵章程籌給三箇月餉乾並每名
發銀二兩五錢製辦雨具又照章於應領正餉

加餉項下每名扣銀一兩以七錢交口北糧臺
購辦米麪以三錢扣解藩庫按季發給各兵家
屬此項銀兩卽由直隸省局按月發給至其號
衣旗幟等件恐長途損壞現今另製一分以備
替換一俟趕造齊備並餉項分別給領卽行督
催起程惟查宣化練兵四月杪已抵庫倫沿途
臺站飛挽運送殆無虛月蒙古困苦已極各臺

駝隻大半倒斃不敷載運口北糧臺所運米麪
停攔尙多現抵烏庫各軍日虞乏食若再令古
北口官兵剋期進發臺站供億不及尤難兼顧
糧運況聞二十一二三臺均報潰散未運糧米
皆已停發大同官兵半皆截留是續調直軍必
須稍緩起程方免前後壅滯目下情形以整復
臺站趕通糧運爲急擬請

飭下察哈爾都統迅將臺站駝隻趕緊設法籌添保護
疏通運路庶到防之軍不致飢潰未發之兵亦
可繼進奏入

上命軍機大臣傳諭李鴻章文盛張廷岳阿爾塔什達
曰古北口練軍一千李鴻章現派都司賈吉齡統帶
並籌給三箇月餉乾酌發雨具號衣等項又照宣化
官兵章程購備月需食米所籌均尙妥洽卽著該督

飭令承辦各員趕將該官兵應需餉銀等項迅速給發催令剋日起程馳赴庫城協同防剿毋稍遲誤前諭文盛趕將已散五臺設法招集其未散各臺妥爲拊循本日李鴻章亦稱目下情形以整復臺站趕通運道爲急著文盛懍遵前旨將臺站趕緊設復並將應需駝隻設法籌添保護俾軍行無阻糧道疏通不得稍涉遷延致滋貽誤此項續調官軍行抵庫倫後

張廷岳阿爾塔什達務當妥籌布置相機防剿應領
餉銀卽由張廷岳等照章接續支放毋令缺乏文盛
前奏布魯圖屬之喜喇穆呼爾五臺弁兵聞有槍聲
紛紛逃避究竟賊匪曾否擾及臺站現在匪衆是否
仍踞烏拉特旗境內抑已由西而東著文盛張廷岳
等多設偵探派兵會合兜剿該五臺與賽爾烏蘇臺
毗連卽赴庫倫大道並恐賊衆避兵而行由東繞道

赴庫均應先事豫籌張廷岳等尤當確探嚴防勿稍大意

初四日癸亥福濟奎昌榮全杜嘎爾奏言烏里雅

蘇台奏調吉林黑龍江察哈爾馬隊三千二百五十員名現均報到所需糧餉必須源源接濟臣等疊次商設糧臺迄未定議現准文盛來咨以奉撥餉銀三十萬兩已經全數起運擬卽在

豁尼齊一帶設立轉運糧臺屬轉咨直隸總督
先在張家口設立糧臺總局由口北道專司其
事按月輓轡傳送臣等再派員在豁尼齊迎提
庶按次撥解各臺易於照料仰懇

天恩飭下直隸督

臣

轉飭口北道總理糧臺以專責成

福濟奎昌榮全杜嘎爾又奏言前因徵調各軍
需用駝馬牛羊氈房集捐匪易當由軍需項下

提銀二萬兩揀員分齎札薩克圖汗三音諾彥
西兩盟長各銀一萬兩以爲採買價值如有不
敷准其再行請領並飛咨庫倫大臣轉飭圖什
業圖汗車臣汗東兩盟長趕卽派員來烏一體
領價竭力照辦仰懇

天恩飭下理藩院諄諭四盟合助庫倫大臣勸諭所屬
一體趕辦以期無誤事機

福濟奎昌榮全杜嘎爾又奏言前調之吉林黑
龍江馬隊五百人早經到防現據統帶官蘇彰
阿稟稱各兵絕糧而臣杜嘎爾大營糧亦缺乏
各軍皆有飢潰之虞烏城素不產糧況經兵燹
實難供支各營兵食而張家口饋運又復不繼
惟有籲懇

天恩飭下察哈爾都統迅將各路馬隊口糧源源接濟

毋或遲緩貽誤事機

奎昌榮全又奏言據杜嘎爾函稱逆賊於四月二十日由圖什業圖汗盟公巴勒達爾多爾濟游牧竄出順新地方向南奔逸去營千餘里各軍追之不及等語查回逆避實就虛肆意奔竄若非合力兜剿日久蔓延辦理愈形棘手臣等擬令棍噶札拉叅一軍移紮烏城東南山溝扼

要堵截吉林黑龍江馬隊附城防守杜嘎爾所
帶馬隊擬留千餘名於哈爾呢敦一帶防堵烏
庫門戶保衛臺路酌分一千數百名會合庫倫
察哈爾綏遠官兵相機迎擊大軍經過地方各
飭所屬一體供應以利遄行務令四面兜撿聚
殲賊衆合無仰懇

天恩飭下該將軍都統大臣迅速派兵合剿以免遷延

貽誤

杜嘎爾又奏言據吉林帶隊官訥蘇肯等報稱
五月十五日逆匪竄向東南至拉蘇倫巴咱爾
所屬游牧之巴爾圖叟吉地方與第十七臺相
距甚近自應趕緊派隊追剿惟各隊行裝並無
駝隻載運且所需口糧俱被各站阻止實無派
隊起程之策不得已派吉爾洪額所帶之隊改

道就近驢賊仍嚴飭管站官玉和與經過該站
步隊令其保護站路 臣到營月餘應用駝馬等
項三音諾彥圖什業圖汗二部落尙有解到者
其車臣汗札薩克圖汗二部落並無消息現已
飛咨各處催解並派員迎提兼催在途阻滯口
糧一俟解到卽行派隊起程相機追剿均奏入

上命軍機大臣傳諭李鴻章定安奎昌榮全多布沁札

木楚文盛杜嘎爾張廷岳阿爾塔什達曰出征馬隊糧餉極關緊要福濟等擬請在張家口設立總局由口北道專司其事按月源源運送一面由烏城派員在豁尼齊等處迎提著李鴻章酌量情形或令口北道親赴張家口或派員前往妥爲辦理期無貽誤惟疏通糧路尤爲第一要著刻下蘇彰阿所帶馬隊在烏城防所已有斷糧之患杜嘎爾營中裹帶之糧亦